






祭輓彙錄卷二十

祭文

維

康熙五十五年歲在丙申夏四月庚寅朔越祭日  
丙寅內閣中書舍人改授知縣期姪維貞內閣中  
書舍人改授知縣期姪維聰仝弟期姪維一維敬  
率男姪等功姪孫廷珏廷鳳廷器廷轍廷柱廷軾  
廷棟廷佐功曾姪孫守仁守義守禮謹以清酌庶  
羞之儀遙致奠於

皇清誥封光祿大夫景翁叔父之靈曰我家宗派繁衍  
考之家乘或家浙西或家新安或家浙東或家吳





門或家武林浙西始祖由宋大理評事晉公僑居於嘉禾之胥山新安由唐紹公不就徵聘移隱於歙州之小溪其支分流派總本於淳安之敦福鄉胥山評事公開其始而襄毅公張大之小溪紹公振於前而牧公熾昌之自是科第之盛在浙右以胥山爲最在江南以小溪爲甲續有從祖墨林公不求聞達孜孜好古兼通書畫流傳不朽駕湖一派莫不是則而倣及墨林公即世族屬雖繁而寢以式微竊謂宗望無人孰爲繼美至

國初而吾叔生焉叔自幼專精誦讀長於詩古文善六書事親以孝敦族以仁嘉言懿行美不勝述嘗憶

春秋二時鳴先叔助祭於謚公之祠每告先大人曰新安景原兄立身行己其志趣類襄毅公而行事頗同墨林公上可以繩祖武下可以式後嗣真吾宗之碩望也貞等心竊識之厥後丁卯隨先大人同詣公車而晉謁叔喜見顏色諄諄以先世之積德累仁豐功偉業叮嚀勿替於將來貞等聞言如坐春臺而襟期豁如始信吾叔生平與所傳不謬也頃年來需次都門適大弟經士通籍西清二弟書存亦謁選邸次所著詩文一時名動公卿都下爲之紙貴貞等朝夕往還叨益實多并悉三弟四弟文章品行卓越不凡非叔父之家學淵源義



方有則孰克臻此方幸天假之年俾宗人之後生  
小子近者親炙遠者聞風傳家聲於久遠而何意  
天奪我叔父之速耶嗚呼人生五福全備者少而  
叔父不或一遺且

紫誥頻頒光榮祖德青箱不墜秀競孫枝叔亦可侍牧  
公襄毅公於地下而含笑無愧矣尚

饗

維

康熙五十五年歲次丙申夏四月庚寅朔越祭日  
壬辰愚姪文隆文慶文光謹以香帛不腆之儀致  
奠於

皇清誥封光祿大夫內閣中書加十二級景原尊叔大  
人之靈曰嗚呼吾叔何遽然而長逝也耶姪輩幼  
拙安居灣海憶昔髫年嘗聞吾父偕伯叔族衆屈  
指吾家宿望其嘖嘖欽仰者靡不首推吾叔焉以  
叔性生孝友情篤宗族每見吾父抵揚相與握手  
細詢家常殷勤款洽意致纏綿吾父歸來一一為  
家人稱述姪輩心竊向往已非一日嘗考生平知



其居家則申國之嚴甫也其居鄉則伯淳之春和也其襟懷則濂溪之光霽也其氣量則叔度之汪洋也其克勤崇儉則陶公之運甓晏子之狐裘也其課訓矧恤則溫公之陰隲純仁之持贈也種種懿德悉在鄉評至才裕齟務用儲軍國事無巨細宜革宜因必賴區畫上下是芘用是得邀

聖天子寵眷恩錫頻頒足以光寵門第誇耀閭里吾父每謂祖宗世澤得吾叔而昌大之咸指爲家人勗焉癸巳歲吾父見背遠蒙吾叔惠弔姪輩苦失瞻依方冀常侍左右仰效儀型俯受提命由此以盡子姪之誼者正自無已無何一旦溘然而竟長逝

也耶嗚呼自今以往姪輩登其堂衣冠劔履如故入其室琴書手澤尚存猶欲追隨左右得以仰效儀型俯受提命又奚從也能不悲哉因悲吾叔益悲吾父腸不寸斷烏可得耶然而吾叔年逾古稀娛樂備至且佑啓後人善爲繼述伯氏仲氏盛世股肱肩內外之重任叔也季也金門待詔儲棟梁之弘材諸孫聯翩繼起經綸在抱行將食報

天家績著民社吾叔榮於身後亦無異於生前又何必爲之歛歔泣下也薄具茗香攄詞申奠靈其不昧鑒我微忱嗚呼尚

饗



維

康熙五十五年歲次丙申四月庚寅朔越三日壬辰愚姪理率男姪孫宗文謹以瓣香束帛清酌庶品之儀致祭於

皇清誥封光祿大夫內閣中書景原尊叔之靈而言曰數日之前有持訃告來海濱者蓋吾叔之逝已廿日矣嗚呼天道人事之不測其為可驚可愕竟如是哉計姪之違離吾叔僅匝月耳何其蒼茫無端真如電光隙駒之易過耶抑杳冥之理有不可推其朝是而夕非耶方姪之侍於几杖也時雖偶嬰小疴而醫藥且見獲痊言語聲歎不減平時姪以



爲復臻康強無疑也曾日月之幾何而吾叔已宛  
其故也能不悲哉嗚呼吾叔不復作矣然其平生  
之德與行足以銘金石而揭日星者未嘗不一一  
深人長思而慨慕也叔且不死叔之事親也定省  
視膳朝夕不違孺慕之誠愉色承志及親之終葬  
祭以禮罔有貽悔孝可風矣叔之教子也義方著  
訓式穀詒謀諸兄弟中蜚聲薇省奏績大郡名著  
上庠文高藝苑而文孫復英英玉立克世其家有  
嗚嗚之節無嘻嘻之嫌慈可法矣叔之尊祖也新  
祠廟以奠蒸嘗修宅兆以崇封樹購遺像以表先  
德追遠報本厚德歸矣叔之待宗黨也則廣置義

田惠逮鰥寡嫁娶有資喪葬有助而且多所提攜  
植生有賴重築石堤水不爲災恢復書院振興文  
教歲設團拜以聯子姓其敦倫贍族之誼雖希文  
復起何多讓焉至於外家之賙卹或興城祀之思  
或行立後之舉仁心爲質發於自然鄉邦誦義不  
虛耳叔以淹雅之才鴻博之識少游廣陵奏刀鹽  
筴一時盡傾其曹每有規畫成效立臻先後視齧  
諸當道無不折節諮詢五十年來事無巨細同業  
咸推領袖而鹽法亦遂駸駸大起平昔交游皆當  
代名公巨卿聞譽日隆叔殆無愧於風流人豪矣  
先君向有博山之業僑寓維揚與叔密邇朝夕故



叔與先君在族中尤稱莫逆獲庇滋多乃復置姪於左右教其不知而導其不逮二十餘年甄陶獎掖凡叔之淑德懿行姪皆親炙而心識今乃遽然淹逝也歎典型之既邈撫君宗之已淪何能不愴心刺骨泣下沾襟也耶嗚呼瞻總帳而增悲望白雲而隕涕敬奠一觴以鳴哀感尚

饗

維

康熙五十五年歲次丙申夏四月庚寅朔越二日辛卯姪鳳翔鳳翥佐朋姪孫鴻標仲德樹經鴻禎維烈謹以瓣香束帛之儀致奠於

皇清誥封光祿大夫內閣中書加十二級景原叔父之靈曰嗚呼老成凋謝自古傷之况誼同宗譜者乎姪於尊叔蓋不勝慨焉吾家系本黃山支分派衍數百年來其間簪纓蟬聯官庠彪列者代不乏人迨尊叔幼負偉志從事儒宗出素裕之才膺鹺政之任興利剔弊裕國儲軍兩淮推爲祭酒

天子旌其勤勞



召對寵錫晉秩崇階可謂名標一時德垂百世者矣而  
且後裔蕃衍堂構相承諸兄弟榮膺臺閣位躋屏  
藩群季俊秀聯翩直上家聲大振獨姪輩移居灣  
海相距四百餘里弗克時親左右間嘗赴揚拜候  
撫慰殷勤多方指示俾姪輩之沾德教而叨福庇  
者不既多乎更見纂修族譜修葺宗祠設塾置田  
啓蒙周急種種懿行難以枚舉方擬矍鑠非常期  
頤可致仰荷提訓正自無窮何以拜辭數月忽一  
旦訃至嗚呼痛哉斯固族之不幸實即鄉國之不  
幸也自今以後追憶生平登堂誰爲指示入室誰  
爲殷勤此姪輩所以歎老成之凋謝而內外之則  
萬一嗚呼尚

饗

傲無從也唯略述素行匍匐陳詞以少伸哀情於



維

康熙五十五年歲次丙申夏四月庚寅朔越五日  
甲午愚姪縉率男姪孫學謨學誠學詩學論謹以  
剛鬣柔毛清酌庶饗之儀致祭於

皇清誥封光祿大夫內閣中書加十二級耐菴尊伯父  
之靈曰天啓吾族實繁有徒惟公挺生碩大且訐  
懿德遠猷難更僕數惠我宗人口碑載路追念先  
君深荷帡幪海濱代庖克始克終小子承事殊懷  
慙忝公無遐棄栽培更篤爰及豚犬方在弱齡教  
之誨之愛重念深藐茲三世皆成舊好愧彼薄俗  
桑陰不保公之行事不讓古人義田麥舟里黨盛



稱在昔晏子奉身彌儉待臣舉火幾滿郊甸以公相方殆有甚焉誰言古道今不復然公於吾族長城是倚有廢斯興有頓斯起憶昔里閭敞於兵焚廬舍蕭條市井空存公眷念之用心良苦補苴掇拾桑麻復故舊祠巍巍漸即傾頽再謀維新公費不貲凡公之為敬祖收族不懈益虔彌久彌篤譬彼中流砥柱是持譬彼大厦梁木是支今公往矣不復返矣砥柱傾矣梁木壞矣狂瀾不迴誰其挽之頽唐覆壓誰其任之緹居迢遞見不能常奉公色笑幸公康強初聞公疾尚冀勿藥訃音忽至疑信交錯奔走駭汗攀望几筵哀號無自有涕漣漣

達人觀化死生一致公已不朽澤流永世如公之壽已逾古稀公之多福戩穀罄宜重重  
丹誥褒封極品有子顯親仕宦光寵身後榮名竚盼將來德厚報隆理數不乖惟公神明來格來止薄奠具陳悲不能已尚

饗



維

康熙五十五年歲次丙申夏四月庚寅朔越祭日  
壬辰愚姪長坤謹以辦香束帛清酌庶饁之儀哭  
奠於

皇清誥封光祿大夫內閣中書加十二級景原尊伯父  
之靈前曰嗚呼悲我伯父鶴駕仙遊吾宗是賴遠  
近蒙庥胡天不弔遽辭林丘嗟坤僻處遠隔邗溝  
憶父昔日曾共持籌經齏溲水手足情週僑居廿  
載往返綢繆中道見背感恩未酬去春三月緣修  
世譜得拜中庭耳提面命指示情深念曰猶子慷  
慨贈金與我成立振起家聲奉辭歸里忽聞變音



匍匐就道百結吾心鸞驂已杳瞻望莫能琴瑟在  
御衣裳在桁圖書寂寞几杖空存覩茲遺澤淚下  
泔泔惟念伯父雖沒猶生大孝顯親屢膺封秩大  
德不官恩流鄉國領袖兩淮同人矜式扶植姻親  
情關休戚至於宗支敦睦尤篤義學以興養田以  
立遡本追遠繪圖墓宅遐邇沾恩難以縷述天相  
吉人宜增耄耆恨彼長庚招遊碧落騎尾白雲逍  
遙極樂追念典型宛然如昨諸昆象賢列居鼎爵  
食報絲絲簪纓繹絡吾又何事深悲罔託溪毛是  
擷醴酒在樽敢告伯父式鑒微忱哀哉尚  
饗

維

康熙五十五年歲次丙申夏五月庚申朔越祭日  
甲子愚姪景命景希景倩景行姪孫灝溶泓淞湜  
湘曾姪孫樹聲樹滋等謹以清酌庶羞之儀致祭  
於

皇清誥封光祿大夫內閣中書加十二級耐菴老叔之  
靈曰嗚呼哲人長逝聞者心悲而况屬在本支常  
切高山仰止之慕能不為之歎息悼恨耶憶前年  
癸巳吾叔屈七十誕辰是時大弟二弟正當晉秩  
之秋而孝思肫摯辭祿養而就色養率諸弟諸姪  
斑舞於膝前三載以來邗江白嶽間庭闈聚順之



風咸相傳爲盛事方期百歲駐顏永遂孝子慈孫  
之願何天奪之速耶嗚呼吾叔往矣然而有不可  
往者存命等宗人也先以叔之篤於族誼者言之  
吾家自晉大司馬以來最爲繁衍分寄四方各極  
昌熾吾叔首於家譜致詳盡焉招徠撫恤在在可  
稽而尤篤於近派悉因其材而成就之清溪千室  
之中賴以給足者鮮不蒙恩而受惠昔范文正之  
於宗族也設義田以贍之吾叔倣其遺法力行無  
間而且救災卹患凡茲同姓孰不躋於衽席之安  
今日之碩大蕃滋伊誰之賜歟夫篤於族誼自能  
盡孝於前人以故孝養情殷寧棄詩書而事齏菘

實爲親而屈非急於生計也精誠所感皆有明徵  
因夢而得佳城無心而獲先像詎非積孝之所致  
而更有以極其追遠之思舉凡塋墓祠宇一一經  
營務在盡倫盡物費雖盈萬曾未少惜因而推愛  
於外家以至鄉黨友朋無所不周數十年如一日  
豈鮮小耶其他穎悟過人才華出衆文章重於士  
林書法珍於藝苑運齏畫策屢動名卿裕課通商  
名聞

黼座何莫非其餘緒而全體大用端不在此夫如是宜  
其

榮封貴極於人臣令德克昌乎後嗣凡今孝子慈孫旣



顯揚者固未有艾而英英濟濟之衆寧得量其光大之所底哉命等生不同地居不同方或寄跡虎林或遠羈京邸不能親叩靈几以展悲哀聊望風酌酒涕淚漣沍遙寄寸詞用當執紼吾叔有靈於焉降格嗚呼尚

饗

維

康熙五十五年歲次丙申夏五月庚申朔越祭日甲子愚再姪候補內閣中書謙雲南永昌府知府詩候補內閣中書誠候選通判諷謹以剛鬣柔毛香帛庶饗之儀致祭

皇清誥封光祿大夫耐菴尊叔祖大人之靈前曰嗚呼存歿之際人所同傷宗族之誼異乎尋常况夫長而賢尊而親高風懿行稔聞於趨庭之時者一旦人琴之俱亡泰山忽頽梁木忽萎其何能不痛悼而悽愴如我叔祖與我先君分雖叔姪乃生同庚學復同窗而骨肉契合水乳不足喻其味膠漆不



足比其固蓋幾幾乎桂馨之與蘭芳維我叔祖幼  
而穎異長益軒昂藝苑英聲不啻雕龍繡虎寰區  
重望何殊峻嶺高岡假使得志濟時展抒懷抱則  
年少終軍無難立奇功於宇內才高賈傅定能陳  
治策於廟廊顧乃追少伯之踪羞誇章句效計然  
之術淡視名場遂爾攬勝江山遨遊湖海試經綸  
於齏策肇大業於維揚待物惟誠溫和可接處衷  
淵穆藻鑑精詳幹旋貫徹乎今古識量并包乎遐  
荒處而不惑者在機宜之揆度任之有餘者乃重  
大之擔當當事時勤諮訪

朝廷錫予輝煌惠沾疎戚沐膏澤者比比德被生死資  
恩全者無量以故根深者其枝自茂源遠者其流  
必長挺生諸叔金玉珪璋半荀龍而冲舉增薛鳳  
以飛颺或由中翰而部曹需次或超司馬而觀察  
方將或明經望重或國學名彰莫不珠聯璧合鵠  
峙鸞翔且也含飴點額人羨汾陽今已晉

誥封於極品行將看朝笏之滿牀叔祖於此樂且無央  
痛我先君忽焉即世維予小子每瞻望白雲而心  
切徬徨幸亢宗之有人惟祝福祉之繁昌雖吳楚  
遙遙天各一方而驛使往還時欣聞夫杖履之康  
強謂上天大啓吾宗必將卷茲碩果享期頤於無  
疆詎意叔祖厭茲塵世遂逍遙而遊於極樂之鄉



訃音忽至痛裂心腸老成云謝匪家之臧時余仲  
弟萬里分符而守郡於滇之瀾滄謙等又以河山  
遙隔執紼未遑惟望風而拜奠有涕淚以沾裳尊  
靈不昧伏惟鑒嘗尚  
饗

維

康熙五十五年歲次丙申夏四月庚寅朔越二日  
辛卯愚姪孫時棟龍標蒼柱琪樹偕曾姪孫卜熊  
為煦懷照光烈敬熙人杰謹以清酌庶饌之儀致  
祭於

皇清誥封光祿大夫內閣中書加十二級景原尊叔祖  
之靈曰嗚呼彼蒼降割吾宗何若是之酷耶吾聞  
人生天地間有所謂罔極難報者惟生我之恩與  
成我之德耳若不才兄弟固父母生之而叔祖成  
之者也孰意前年仲夏吾父云亡今歲季春叔祖  
告殂罔極深恩涓埃未報而彼蒼者相繼奪去何



其酷耶吾宗本支繁衍叔祖篤念木本水源咸加顧恤與吾父兩心莫逆契好尤深方其初至維揚邂逅相逢即慷慨期許誓他日不相遺棄及叔祖網紀淮鹺蔚然名重一時其事業隆隆日起人咸服吾父知人果不爽也甲寅乙卯之交吾父持籌失計家道陵夷賴叔祖調劑維持不至顛躓數十年來左提右挈有加無已始信久要弗忘吾叔祖古道照人哉辛卯歲不才棟幸與南闈鄉薦叔祖聞捷喜溢眉端謂人曰我知若自幼不凡必非以諸生老者及辭赴公車執手相送勗之曰吾族自飛熊姪得第後於今幾三十年遲久未發繼飛熊

而起者非子而誰子其勉旃不料命運乖違未能仰副厚望下第南歸踉蹌抱媿荷叔祖慇懃慰藉仍以遠大爲期乙未會試適丁父艱每念叔祖屬望之情玉成之德雖寤寐中亦慙汗交流意忡忡不自寧也前年夏仲叔祖以公事入省與吾父旬日留連歡洽倍於往昔或買艇秦淮或携筇虎踞朝夕弗暫離聞叔祖事畢將回正藉銀燭清樽相與雄談快論酒數行而吾父頭眩莫支遽就寢榻叔祖一夜數起問所欲惟以不才兄弟託付丁寧至次晨而吾父逝矣易篋之頃時棟龍標皆未在側叔祖親視含殮痛哭悲哀如失左右手人僉曰



祭軒輿錄卷三  
叔祖之來殆有精誠默感故不厭久與盤桓以待  
吾父永訣者蓋初見莫逆之情至有終無間云今  
春時棟兩接手書聞尚善飯維艱步履閏月之初  
忽覺心動乃促棹拜省已在彌留之際聞呼回顧  
執手淒然欷歔不能成淚不逾時而叔祖逝矣嗚  
呼痛哉叔祖與吾父生同歲使天祐吾宗俱得延  
齡益算坐享期頤詎非人子至願何以未浹兩年  
而生我成我者俱棄人間矐言罔極欲報靡從不  
禁搔首酸心痛叔祖而思吾父因吾父而愈痛叔  
祖也茲具時羞載陳芳醴尊靈不昧庶幾來歆尚  
饗

維

康熙五十五年歲次丙申夏四月庚寅朔越二日  
辛卯愚再姪鴻雯鴻緒再姪孫相林松植模桐煜  
暄暉昭曠曜暎曦謹以辦香束帛清酌庶饁之儀  
致祭於

皇清誥封光祿大夫內閣中書加十二級景原太叔翁  
之靈曰嗚呼我翁遽棄人間世耶雯等同寓斯地  
感念彌深想其堅凝不拔之志篤厚無私之誠慕  
義勇爲之概解紛遊刃之能肫然慈惠之德斂而  
不佚之形鍾山川之秀淑蔚磊落之異人吟咏具  
唐之風格法書摩晉之後塵一局觀夫變幻全枰



餘事錄卷三  
視其縱橫餘業精於布算大節邁乎等倫既敦親而睦族亦樂善而施仁孤寡賴其厦庇宗祠仗以獨新里有善士之目鄉多孝讓之稱已身登於仕籍更疊受乎

恩榮正才華之未艾何齎志而珠沉嗚呼人生極壽難遇百齡孰能免於捐棄共歎籬廬之匪真究歸夫同盡舉似乎秋雲惟大名之克立又何羨乎千椿况賢嗣之彬蔚可媲美乎麟徵皆策名於

盛代並光耀乎門庭福已臻於全備壽且越乎七旬故彌留之無憾遂溘然而長冥雯等久承煦愛一旦瞻靈能無嗟愴孰已悲情謹申乎薄奠冀少展其

微忱倘精爽之如在祈駕鸞鶴而鑒此椒馨尚饗



維

康熙五十五年歲次丙申夏四月庚寅朔越二日  
辛卯愚再姪菁芝芸菖著本誠本閭再姪孫士楷  
潤謹以剛鬣柔毛清酌庶饗之儀致祭於

皇清誥封光祿大夫內閣中書加十二級景原尊叔祖  
之靈前曰嗚呼惟夫扶輿蜿蟺而磅礴常孕毓夫  
偉人吾家歛南之桂水氣清淑而含醇蓮華三疊  
以聳峙芙蓉橫亘而連雲惟予叔祖之篤生實鍾  
間氣而秉其純譬璠璵之與琬琰蓋非一家之器  
而爲當世之珍薰陶旣親乎張載切磋又得乎徐  
陵才藻則踔厲風發腹笥則經史紛綸宜其辨奪



駒王之席人投荀氏之輪抱負既迴然絕俗知天生之有意胡毛羽之將豐望雲衢而未試綠春暉之漸暮慨田荆之獨植仲氏之悲南來曾參之養是遂不廊廟而江湖寄齶筴而展志驚才肆應於不窮高軒數過而謁刺賓主盡東南之美聲聞不脛而日致是宜同業推爲祭酒而

九重鑒其勞勩

曠典屢邀於疏請

宸章仍出於親賜丘壑奏夔龍之望通德表人倫之瑞匪獨亢身而亢宗抑亦寢昌而寢熾昔者當吾宗之振起號稱全盛之鄉自中罹乎兵燹事每變乎

滄桑繫叔祖之蹶起遂載顯乎其光新廟秩然其奕奕春秋永奠夫烝嘗展祖墓而松楸再植封馬鬣而孝逮泉壤撫列祖之源長澤遠購遺像而復覲冠裳此皆來孝之聿追允爲百世之表坊况乎置義田以贍族歲每散乎倉箱築長堤以捍患洪波息而蛟螭遁藏滌溪之書院肇起先賢之遺蹟復彰他如廣厦之庇寒士膏火以勵書香又其育材之盛舉而悉徵用意之深長原夫叔祖之敦倫厚紀雖古篤實之君子亦無加於其詣矧嘉言懿行之孔昭其足垂爲典則者無不仰其樂只而豈弟則生而爲鄉邦之光歿而無媿於社之祭天之



報施不爽既及其身以光榮而又爰及於後世或  
翱翔鳳池握掌

絲綸之重或剖符列郡而奏績於繁劇行將名疏  
御座進而驟躋顯列以羽儀

天朝豈止媿隆於萬石而僅稱其舉策數馬之細嗚呼  
人為完人福為全福天奚猶靳之以百歲雖自古  
而莫不皆然獨叔祖之存與歿視夫常人而特有  
異歲既匪乎龍蛇命胡為乎有制覩梁木之已壞  
傷哲人之永逝歌薤露之易晞愴予心兮焉繫嗚  
呼哀哉菁等誼既關乎一本脉復係兮潛通或親  
問疾於幃側或遠聞乎鞠凶大招招兮不起託幽

懷兮悲風跼陳辭而進酒冀昭鑒乎此衷嗚呼哀  
哉尚

饗



維

康熙五十五年歲次丙申夏四月庚寅朔越二日  
辛卯愚姪孫輔仁偕侄曾姪孫尚義謹以剛鬣柔  
毛清酌庶饗之儀致祭於

皇清誥封光祿大夫內閣中書加十二級景原叔祖之  
靈曰嗚呼聞之語云悲莫悲兮生別離夫生別猶  
悲矧其為永訣乎矧其為誼切情深如姪孫輔仁  
之於吾叔祖乎公之嘉言懿行彰彰在人耳目者  
未易枚舉即其業齟於揚以才德兼優久推為兩  
淮祭酒凡事關鹽務有利必興有害必除雖當事  
者任之實吾叔祖之心儀手畫有以成之也故當



夫

聖主南巡天顏咫尺猶不惜披瀝陳詞以解商困則仁人之利溥矣而推恩之序尤篤本支其在徽者不以遠而或遺其在揚者則以近而彌切有如輔仁與弱弟幼而失怙門庭衰薄惟母是依僻處海濱其得以免於摧殘不致失所者皆叔祖之蔭庇居多及徙宅郡城而家業甫就奈鴈行中斷弱弟遽爾云亡煢煢獨立傷如之何然哀悼之餘猶幸與叔祖追隨裨益良深乃曾幾何時不一再歲而叔祖忽抱微疴艱於酬應始亦謂老老倦勤或人事之適然豈知一病不起竟以殞其天年予獨何心

能不悲哉雖然人惟無恃以垂不朽雖生猶死人果有所恃以垂不朽雖死猶生若我叔祖之德業聞望非所謂死而生者耶且又得諸父昆季克紹箕裘能繩祖武以致身登仕籍膺顯秩而列崇班者屢有其人行且印纍纍而綬若若當不一而足此又輔仁之轉悲而為喜可為叔祖大慰者矣尚饗



維

康熙五十五年歲次丙申夏四月庚寅朔越二日  
辛卯姪孫長潼率男曾姪孫逢璋逢珮逢璠逢珽  
逢珺逢球逢琮孫再曾姪孫嗣普嗣旭嗣昌嗣晟  
嗣昊嗣昊嗣暹嗣昺嗣昱謹以瓣香束帛清  
酌庶饗之儀致祭於

皇清誥封光祿大夫內閣中書加十二級景原叔祖之  
靈曰嗚呼九京可作古人嘗擇所從賢士淪亡春  
者爲之罷杵惟其德與澤之入人者深故人之思  
慕悲哀而發於情之不容已也吾叔祖德積厥躬  
澤流及物一旦厭世騎箕人銜殄瘁之傷路動歎



欵之戚者在在皆然况潼夙荷喬陰誼關一本且  
又知吾叔祖最深其驚心痛悼又當何如耶嗚呼  
吾叔祖幼而聰慧工文章有聲西陵緣篤二人之  
養遂棄儒業鹺務其高才偉識皆得力於讀書稽  
古故一切因時制宜每見許於當事凡有所爲必  
就商確而後行由是鹺業大振而聲名遂籍籍公  
卿間五十年來爲諸同人之冠

天子巡狩江南獲承

顧問頒賜

御書克食稱一時曠典是叔祖不第爲一時同人推戴  
而且名達

九重矣顧不偉歟然叔祖僑居邗水而尊祖敬宗之心  
尤爲惓惓新宗祠以隆追報勅文會以育人才築  
石隄以禦水患置義田以濟貧乏此皆不朽之業  
而遠近服義者也至若賑人之急救人之危排人  
之患難助人之婚喪自邇迨遠由親及疎沐其澤  
者殆不可以枚舉嗚呼豈非吾叔祖天性仁愛行  
德樂義久而不倦也歟方擬享期頤臻耄耄以集  
無疆之慶乃今忽奄然長逝也痛忍言哉雖然壽  
逾七十亦人生之所稀有兼之諸叔之在朝者珥  
筆含香出守者重膺民社餘皆文壇樹幟藝苑蜚  
聲諸弟輩蘭芽玉茁後先輝映吾叔祖乃沐



祭軒輿錄卷三  
恩榮於紫泥播賢聲於邦國爲族黨之一人潼之所不能忘情者天奪善人之速而族黨中無所矜式而倚賴焉迴憶吾叔祖之在時而益深其悲也言有盡也意無窮也爰以酒醴恪獻尊靈來格來歆嗚呼尚饗

維

康熙五十五年歲次丙申夏四月庚寅朔越二日辛卯愚姪孫苑蓋謹以瓣香束帛清酌庶饗之儀致祭於

皇清誥封光祿大夫內閣中書加十二級耐菴叔祖大人之靈曰嗚呼人莫不幸生而悲死然使誼不相屬而幸之之念未必深悲之之意未必切嗚呼吾先祖與公分固兄弟情爲最密先府君嘗言吾先祖存日少長於公公以筆墨事時時見質於吾先祖吾先祖亦不固讓可其所可否其所否以至花晨月夕竟日忘歸終宵聚首戀戀若有所不能已



吾先祖嘗謂府君曰公之德器深厚才力過人真  
吾族之偉人必大昌厥後今令子賢孫文章事業  
皆不出吾先祖所意料也吾二叔超聰明嗜學公  
見之即以大器許命子姪輩從游其知人之哲又  
何如也嗚呼吾先祖下世迄今已廿年餘吾家之  
伯叔兄弟或賞其才則任以事或嘉其志則望成  
名雖公之素性如此吾族之被其光者夥矣然孫  
等感激之私覺於吾家獨惓惓耳嗚呼以公之神  
明何難臻耄耄享期頤方踰古稀即溘然長逝則  
孫等平日幸生之心又不得不為哀死之痛也尚  
饗

維

康熙五十五年歲次丙申夏四月庚寅朔越祭日  
壬辰愚再姪萬鎰再姪孫世隆世爵世祿謹以辦  
香束帛清酌庶羞之儀致祭於

皇清誥封光祿大夫內閣中書加十二級景翁叔祖大  
人之靈曰嗚呼梁木之嘆興矣少微之星隕矣如  
吾叔祖之一朝厭世而去也可不痛哉遠近之人  
聞其訃者未有不愕然而悲愴者而况鎰等辱在  
譜系常荷深慈能不吞聲忍淚稍盡寸言以達悃  
誠也耶憶鎰自王父辭里創業維揚家道漸昌不  
幸中年早逝而吾父尚幼且時值鼎革以故家道



中落并桑梓之往迹祠墓不能悉知及長而常以  
為恨至鎰益懵然矣幸叔祖策齋於揚始得與書  
存叔父共居真州乃由此以謁叔祖殊不知留神  
族誼博訪宗支而鎰之祖先塋墓譜系遠近已經  
條分縷析朗然於叔祖之襟懷久矣嗚呼向微叔  
祖水源木本之仁推及數十餘年之上則鎰不於  
今猶蒙蒙乎鎰竊私幸叔祖由耄耋而登期頤將  
仁者之壽無疆而鎰之親叔祖之教誨者正自未  
艾奈何竟棄鎰而長逝也可不痛哉然而叔祖之  
生平懿德其報本追遠加惠斯人者彰彰在人耳  
目間也如宗祠修而有輪奐之華親寢成而備丹

牘之美故園石隄再築而水患以除滌溪精舍重  
新而世澤永賴精神遠洽遺照常存惠利溥施族  
姻共渥以至鬻子者代為之贖窮途者急為之周  
嗚呼凡若此美筆不勝述若其胸次光明出言磊  
落排難解紛隆文力學受

天眷之寵而賜極品之榮衍後人之慶諸叔父輩皆以  
文章起家通籍承明蜚聲臺省張英風聯重譽以  
及諸弟兄後先相望不異王謝之盈庭竇韓之並  
駕也叔祖雖逝而美報又無終期矣復何遺憾哉  
而鎰之濡淚而陳詞者則以典型不作儀範無從  
感指示之非遙思教言之不獲聊憑臆見以罄所



勞勳身錄卷三十一  
聞哽噎而陳曷可為文椒醕以奠俎豆斯登神其  
有知益鑒微誠尚

饗

維

康熙五十五年歲次丙申夏四月庚寅朔越祭日  
辛卯愚再姪孫廷讓逢聖率姪男士鑲元謹以剛  
鬣柔毛清酌庶羞之儀致祭於

皇清誥封光祿大夫內閣中書加十二級景原叔祖之  
靈曰嗚呼吾族於里門舊稱蕃衍以叔祖治鹺維  
揚凡族之僑揚者皆得聆叔祖教益而廷讓輩尤  
荷關切之誼今奄忽厭世曾不少延胡能不顧之  
而愀然念之而黯然而叔祖少習舉子業遊武林  
適叔祖長孺公秉鐸玉峯一見而異之曰文藻煥  
發氣宇不凡他日必亢吾宗是時長孺公已值暮



齒粹然邂逅深相許可特竒其華國有才而不知其胸藏經濟尤迥出於流匹也無何棄章句之學為堂上謀甘旨才能練達為同儕所首推一時卿士大夫咸為折節願交凡繡衣使者先後來視齟亦無不虛懷延訪倚其一言立見成效由是獻納上動

天顏行在獲邀曠典

褒封崇秩三世均榮莫不以為第祿之來有加無已而長孺公曩者卜其可以亢宗良可謂明於知人矣兩淮為南北要衝叔祖熟鹺政利弊力為維持家道亦駸駸日起叔祖天性純厚友生戚屬而外雖

鄉里之汎行道之疎靡不沾其膏馥而於先塋則以次修築復樹碣繪圖俾久而可稽宗祠勤於繕葺頓還舊觀先世遺像徧丐名公卿為贊以光卷軸每歲首團拜少長咸集讌飲一堂不以世遠而聽其散佚至敬禮諸從父而以一體周其存亡友愛從兄弟而必諄復授以常業諸如置義田以贍窶貧增隄防以奠室廬造橋梁以便行役孰非大有造於族者耶吾姪元去冬歸里得附采芹罔非叔祖獎勸之力吾弟至今感於懷方期勉力寸進以副所望孰意入春以來夙疾時作百方調治而竟不起也叔祖年踰古稀諸福全備膝前諸叔翁



抱負非常伯仲旣掌絲綸膺民社有聲於官叔季  
並儲才待用孫枝挺秀繼叔祖而亢吾宗者又將  
於後人卜之其亦可以快然而無憾也已所可惜  
者哲人云亡老成凋謝兩淮失一長城闔族少一  
宗主而况謏陋如廷讓輩素蒙青盼久挹光儀一  
旦失所依賴悲從中來淒然隕涕敬陳絮酒盡此  
微忱靈其有知尚其鑒之哀哉尚

饗

維

康熙五十五年歲次丙申四月庚寅朔越祭日甲  
午愚元姪孫嗣襄率男雲姪孫新桂雙桂謹以辦  
香束帛清酌庶饘之儀致祭於

皇清誥封光祿大夫內閣中書加十二級耐菴高叔祖  
大人之靈曰嗚呼公果嬰何疾而遽捐館舍耶襄  
聞喪之日始而疑繼而悲不覺其失聲而慟也於  
是馳數百里臨哭則公歿已閱月矣襄至視其几  
筵彝器雜陳此前日之拂拭而摩挲者也視其尸  
位裳衣周設此前日之服御而曳屣者也視其豆  
籩膏香時薦此前日之式食而品嘗者也嗚呼物



則是而人則非此固人情之所同慨而如襄之獲  
愛於公尤深感愴者矣吾宗客廣陵者不下百人  
率以公爲依庇其來也必爲之量材授事俾皆各  
得其所而後快又常念吾鄉故事歲時伏臘宗人  
競集銜杯酒接慇懃講明祖德之源流諷諭後生  
之賢否乃恒以不克時到故山爲惜故每於歲首  
時懸挂祖容設讌團拜而公以耆德尊望分又最  
長冠裳五世濟濟雍雍萬石君之門風陳太丘之  
家法萃於一時襄於列次中齒尤卑幼承顏色親  
几杖奉命惟謹公乃以爲可教時時進諸左右遂  
得佐力於安豐獎成引掖不遺餘力又復齒芬於

齋憲獲蒙委任襄亦夙夜寅畏悉心祇承兢兢然  
常恐稍蹈謬戾有負公平昔甄拔之雅然每有疑  
事造請輒不以時而公未嘗不懽然相接酬酢之  
間精明強固志氣不衰竊以爲百歲可期私心默  
祝以附於古人稱願之意孰知人生之變旦異夕  
殊向之勤勤款款所歡然相接者今竟何如則今  
日奔越而臨哭也非徒感知遇之難忘抑又歎吾  
宗之仁人耆碩欲使其幸而久在於世亦不可得  
嗚呼可哀也已薄奠一觴伏冀來歆尚

饗



祭輓彙錄卷二十

祭輓彙錄卷二十

